

Expediente IET: P-22-414
Proxecto: Parque eólico Touriñán III-2
Concellos: Cuntis, A Estrada e Campo Lameiro (Pontevedra)
Promotor: Greenalia Wind Power Touriñán, S.L.U.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 29/06/2022 o Servizo de Enerxía e Minas de Pontevedra da Vicepresidencia Primeira e Consellería de Economía, Empresa e Innovación, somete a informe do Instituto de Estudos do Territorio (IET) o documento "Contestación ao requirimento do IET relativo ao EIIP do EIA do Parque eólico Touriñán III-2", de data xuño 2022 (con data de sinatura dixital 17/06/2022).

1. Antecedentes:

Con data 06/06/2022 o IET emitiu un informe de impacto e integración paisaxística sobre este parque eólico, no marco do procedemento de avaliación de impacto ambiental ordinaria. Neste informe indicábase que se debería completar o EIIP coa identificación das formacións rochosas con valor paisaxístico e evitar a afección aos afloramentos rochosos na contorna dos aeroxeradores AE-01 e AE-05, así como estudar como alternativas de accesos aos aeroxeradores AE-01 e AE-02 o camiño que discorre ao sur e en paralelo ao regueiro Ponte dos Fornos ou o camiño que parte do acceso aos aeroxeradores AE-03 e AE-04 e discorre en dirección sur.

De forma simultánea estase a tramitar o proxecto de interese autonómico, sobre o cal o IET emite informe nesta mesma data.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise da documentación achegada, dos efectos do proxecto sobre a paisaxe e das medidas de integración paisaxística:

A documentación que se somete a informe consiste nun escrito xunto cun documento de contestación ao requirimento do IET no que analiza a contorna onde se proxecta situar



aeroxeradores AE-01 e AE-05, aportando fotografías do lugar de implantación e se explican as medidas propostas para minimizar a afección aos afloramentos rochosos como que as plataformas de montaxe dos aeroxeradores están deseñadas sen a zona de provisión xa que as palas dos aeroxeradores serán montadas no momento en que cheguen a localización do aeroxerador.

En relación aos camiños de acceso aos aeroxeradores AE-01 e AE-02, o documento aportado sinala que a alternativa de empregar o camiño existente paralelo e ao sur do regueiro Ponte dos Fornos sería inviable por dous motivos, por unha parte sería necesaria a ampliación do camiño o que suporía que os desmontes e terrapléns invadirían a zona de servidume de tránsito, e por outra parte a pendente deste camiño oscila entre un 12% e un 25%, sendo a pendente máxima pola que poden circular os transportes do 14%. Respecto da alternativa de empregar o camiño que parte do acceso aos aeroxeradores AE-03 e AE-04 e discorre en dirección sur, o documento aportado sinala que este camiño atravesa a área de cautela de dous bens integrantes do patrimonio cultural, o xacemento arqueolóxico Monte dos Cregos e as cruces e inscricións do Monte dos Cregos, o que fai inviable esta alternativa de acceso.

4. Conclusión:

Polo que atinxe ao contido do EIIP, este considérase axustado ao disposto no artigo 11.2 da Lei 7/2008 e nos artigos 26 e seguintes do RLPPG, se ben deben integrarse nel os contidos do documento "Contestación ao requirimento do IET relativo ao EIIP do EIA do Parque eólico Touriñán III-2", de data xuño 2022, sen que sexa necesario someter a documentación a novo informe do IET.

O principal impacto paisaxístico deste proxecto será a incidencia visual producida polos aeroxeradores, que pola súa forma e altura, serán visibles desde unha ampla extensión de terreos e a longas distancias; esta incidencia perdurará durante o tempo en que estean instalados os aeroxeradores, e verase incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual cabe destacar as AEIP, miradoiros, rutas de sendeirismo, e os núcleos de poboación. Esta incidencia visual, aínda que non pode ser mitigada con medidas correctoras agás nos núcleos rurais, non supón un impacto crítico. A este respecto, considérase adecuada a medida recollida no EIIP, relacionada coa directriz de paisaxe DX.20.c, de prever a execución de pantallas vexetais nos núcleos de poboación de existir unha manifesta preocupación social polo impacto visual dos aeroxeradores.

En todo caso, de acordo co artigo 30 do RLPPG, as medidas de integración paisaxística determinadas no EIIP deberán quedar oportunamente recollidas nos planos e orzamento do proxecto.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

